

## **Atuarfinni atuakkanik atorniartarfiit pillugit Namminersornerullutik Oqartussat nalunaarutaat nr. 10, 14. maj 2003-meersoq**

Atuarfik pillugu Inatsisartut peqqussutaanni nr. 8, 21. maj 2002-meersumi § 22, imm. 3 malillugu aalajangersarneqarpoq:

### *Siunertaa atuuffialu*

§ 1. Atuarfik pillugu Inatsisartut peqqussutaanni nr. 8, 21. maj 2002-meersumi § 22, imm. 2 malillugu atuarfinni tamani atuarfimmi atuakkanik atorniartarfimmik pilersitsisoqassaaq.

Imm. 2. Atuarfimmi atuakkanik atorniartarfiup siunertaraa atuarfiup siunertaata siuarsarneqarnissaa, atuarfimmi atuartunut ilinniartitsisunullu atuartitsinermi atortussanik pissaqartitsinikkut. Taamatuttaaq atuarfimmi atuakkanik atorniartarfiup atuartut sunngiffimminni soqutigisaat kiisalu ilinniartitsisut atuartitsinermit tarnillu pissusiinut tunngasunik ingerlaavartunik malinnaamissamik pisariaqartitsineri isiginiartassavai.

§ 2. Kommunini arlalinnik atuarfimmi atuakkanik atorniartarfilinni kommunimi ataatsimut atuagaateqarfimmik pilersitsisoqarsinnaavoq kommunip atuarfiisa tamarmik atuartitsinermit atortussanik atorniartarfigisinnaasaannik, soorlu klassinut naammattukkuutaarlugit.

§ 3. Atuarfimmi atuakkanik atorniartarfiup imarissavai atuarfiup atuartitsinermi atortui, periaatsit atuakkanik atorniartarfinni nalinginnaasuni atorpeqartut assingi atorlugit nalunaarsorneqarsimasut. Taakkununga ilaassapput atuarfiup atuagaatai, atuartitsinermi atortussat isiginnaagassatut tusarnaagassatullu suliat, atuartitsinermi atortut elektroniskiusut, paasissutissanik siammarterutit nammineq peqataaffigisinnaasat atortussallu allat atuakkanik atorniartarfimmiittussatut naleqquttut.

Imm. 2. Atuarfimmi atuakkanik atorniartarfiup nammineq pigisai ilajumallugit Pilersuiffimmit, Nunatta Atuagaateqarfianit § 2-lu naapertorlugu kommunimi ataatsimut atuagaateqarfimmit atorniartoqarsinnaavoq.

Imm. 3. Atuarfimmi atuakkanik atorniartarfiup atuarfiup atuartitsinermi atortuisa tamaasa, atuakkat ilanngullugit, nalunaarsorneqarnerat ingerlateqqinneqartarnerallu ingerlassinnaavai. Atuarfimmi atuakkanik atorniartarfiup atortussat allat aamma aqussinnaavai.

§ 4. Atuarfimmi atuakkanik atorniartarfiup atortussaatai tamatigoortuussapput sapinngisamillu nalitsinni pissusiusunut naleqquttuussallutik.

Imm. 2. Atortut atuarfiup atuartitsinerani atorpeqarsinnaassapput atuartullu assigiinngitsunik piginnaaneqarnerinut naleqqussagaassallutik.

Imm. 3. Atuarfimmi atuakkanik atorniartarfik atuarfik pillugu paasissutissanik kiisalu ilinniartitsineq pillugu atuakkianik peqassaaq.

§ 5. Atuarfimmi atuakkanik atorniartarfimmut atatinneqarsinnaapput paasissutissanik

siammarterinermut sullivik taamatulluunniit suliaqarsinnaanermut periarfissat, tassani atuartut ilinniartitsisullu paasissutissanik katersanik suliareqqiinnermut ingerlatitseqqiinnermullu, paasissutissiisarnermut teknologip nutaap, tassunga ilanngullugit qarasaasiakkut avammut attaveqaatit qarasaasianilu paasissutissanik katersaateqarfiit, qanoq atorneqarsinnaaneranut ilinniartitsinermilu immikkut suliniutit ingerlanneqarnerinut atatillugu ilitsersorneqartassallutik. Taamatutaaq atuartitsisut ilinniartitsinermi namminneq atugassaminnik suliaqarneranni teknikikkut ikiorserneqarsinnaapput.

**§ 6.** Pilersuiffimmit ilinniartitsinermilu atortussanik neqerooruteqartartut allat paasissutissiisutaat tungavigalugit atuarfimmi atuakkanik atorniartarfik peqataassaaq ilinniartitsinermi atortunik neqeroorutaasunik atuarfiup ilisimatinneqartarnissaanut.

Imm. 2. Atuarfimmi atuakkanik atorniartarfik atuarfik pillugu Inatsisartut peqqussutaanni nr. 8, ulloq 21. maj 2002-meersumi § 9, imm. 1 naapertorlugu najukkani ataasiakkaani ilinniartitsissutissatut toqqakkanut atatillugu kulturikkut ingerlatsiviusinnaavoq. Atuarfimmi atuakkanik atorniartarfik aamma atuarfimmi atuartunut kulturikkut neqerooruteqarsinnaavoq, soorlu isiginnaartitsinernik, oqalugiarnernik, saqqummersitsinernik il.il.

**§ 7.** Atuartut ilitsersorneqarlutik atuakkanik sunngiffimmi atuagassaminnik pisariaqartitaminnillu atuartitsinermi atortussaminnik angerlaassinnaasaminnik atorsinnaassapput. Atuarfimmi ilinniartitsisut atuartitsinermut piareersarnerminni atortussaminnik angerlaallugit atornissaminnut periarfissaqassapput.

**§ 8.** Atuakkanik atorniartarfiup peqataaffigissavaa atuartut atorniartarfimmik atorniartarfiullu atortuinik annerusumik ilisimasaqalernissaat, piginnittussaanermut tunngasut ilanngullugit, taamaaliornikkut atuartut paasissutissanik ujarlernermi periaatsinik, soorlu paasissutissaasivinnik qarasaasianiittunik, pioreersunik atuilersinnaaqullugit, atuartut atuakkanik atorniartarfimmi atortunik atorneqarsinnaasunik atuartitsinermi atuisinnaalernissaannut kiisalu atuartut sungiussitinniassallugit kommunip atuakkanik atorniartarfiisa atornissaannut.

### *Ingerlatanik isumaginninneq*

**§ 9.** Atuarfimmi atuakkanik atorniartarfimmi ingerlatsinermut isumaginnittussatut ilinniartitsisut ilaatinneqassapput ilaatigut makkuninnga isumaginnittussatut:

- 1) atuartitsinermi atortussanik ilaatigullu paasissutissiisarnermut teknologip atuartitsinermi piareersaatit atornissaannik ilitsersuinissaq,
- 2) atuarfiup pineqartup ineriartorneranut paasissutissat naleqquttut ingerlatittarlugit,
- 3) atuarfiup atuartitsinermi atortui nalunaarsorlugit aqqissuullugillu,
- 4) atuartitsinermi atortussat pineqarsinnaasut paasissutissiisutugalugit,
- 5) atuartut angerlaassillutik atorniarnernanni aammalu atuakkanik atorniartarfimmik atortussanillu ilitsersorlugit.

Imm. 2. Ilinniartitsisut atuarfimmi atuakkanik atorniartarfimmi sulisutut ilinniarsimasariaqarput, taamaaliornissamut piumassuseqassallutik allatulluunniit suliassamut naleqquttunik pikkorissarsimassallutik.

Imm. 3. Atuarfimmi atuakkanik atorniartarfiup ulluinnarni ingerlanneqarnerani ilinniartitsisoq

atuarfimmi pisortamit § 9, imm. 2-imi pikkoriffissat taaneqarsimasut tunngavigalugit toqqarneqarsimasoq, ilinniartitsisuusaaq.

Imm. 4. Kommuni,i atuarfimmi atuakkanik atorniartarfiini ingerlatsisuusut ilaat atuarfiit atuakkanik atorniartarfiini pisortaanertut toqqarneqassaaq.

Imm. 5. Atuarfimmi atuakkanik atorniartarfinni pisortaanerup makku isumagissavai;

- 1) atuarfiit atuakkanik atorniartarfiini sulisut sulinerisa ataqatigiissarnerat,
- 2) kommunimi atuarfiit atuakkanik atorniartarfiinut atortussanik pisiortornerup ataqatigiissarnera
- 3) nunaqarfiit atuarfiini atuakkanik atorniartarfeqarfimmi atassuteqaataaneq

**§ 10.** Atuarfimmi atuakkanik atorniartarfiup ammasarnera sapinngisamik atuarnerup nalaa tamaat pisassaaq. Atuarfimmi atuakkanik atorniartarfiup initai atuartitsivittut atuakkanik atorniartarfimmut attuumassuteqanngitsunut atorneqartariaqanngillat.

#### *Inuit nalinginnaasumik atuakkanik atorniartarfiata suleqatigineqarnera*

**§ 11.** Atuarfimmi atuakkanik atorniartarfik inuillu nalinginnaasumik atuakkanik atorniartarfiat atuakkanik atorniartarfeqarnermut malittarisassat atuuttut malillugit meeqqat atuakkanik atorniartarfisigut sullinneqarneranni suleqatigiissapput tamatumalu saniatigut kommunimi atuakkanik atorniartarfeqarneq ataqatigiissassallugu.

Imm. 2. Inuit nalinginnaasumik atuakkanik atorniartarfia atuarfimmilu atuakkanik atorniartarfik peqatigiillutik atugassaateqaraangata atuarfimmi atuakkanik atorniartarfiup atuakkat atortissinnaasai tassaassapput atuarfik pillugu Inatsisartut peqqussutaanni nr. 8, 21. maj 2002-meersoq naapertorlugu § 42, imm. 6-imi atortussat atuarfimmi siulersuisut akuerisimasaat.

#### *Atuutilernera*

**§ 12.** Nalunaarut manna 1. august 2003 atuutilerpoq.

Imm. 2. Tamatumunnga peqatigitillugu Kulturimik Atuartitsinermullu Aqutsisut atuarfinni atuakkanik atorniartarfiit pillugit kaajallaasitaa 20/80 atorunnaarpoq.

Namminersornerullutik Oqartussat, ulloq 14. maj 2003.

Arkalo Abelsen

/

Lise Lennert Olsen